

von Wulf Wager

Schneeschippa



Leitla, i war em Urlaub em Schnai en Tirol. Des war ganz wunderbar. Sehr erholsam ond 's hot en Haufa Schnai ghet. Oimol hot's drei Dag hendranandr gschneit, so dass uf älle Autos fascht anderthalb Meter Schnai glegaisch. An sellem Dag ben i vom Langlaufa noch zwoi Stond zrück komma ond han agfanga, mei Auto freizomschaufla. Des war garnet so oifach, weil

zwische de nebaanander parkende Autos praktisch au nix als Schnee war. Oi Roih von Hubbel. Also han i gschippt ond gschwitzt ond gschippt ond gschwitzt.... Noch ra guada halba Stond und ma guada Liter vergeudetem Schweiß han i feschtstella missa, dass i 's falsche Auto han afanga freischippa Heimatsalat, han i mi aufregt. Also han i nomol agfanga. Mittlerweile send au no andere komma ond hend ihre Autos ausbuddelt. Dommerweis hot's no wieder drei Dag durchgschneit. Also han i wieder anfangaschippa ond schaufla. Diesmol han i mir genau gmerkt, wo mei Auto gstanda isch. Noch ra halbe Stond hot sich do aber a roter statt wie bei meim Auto anthrazit-farbener Lack zoigt. I han gmoint i spenn. No ben i los ond han bei älle dreißig zugschneite Auto uf dem Hotelparkplatz erscht mol d' Nommratafla freikehrt. Mei Auto isch ganz woandersch gstanda wia letscht Mol. I han gmoint i sieh Gspenschr. Wo i bei meira Frau läschterlich abkotzt han, hot die mir ganz kloilaut vrrota, dass' se noch meira erschta Freischaufelaktio gschwend em Städtle war ond a paar Mitbringsel kauft hot. No häb se 's Auto halt woandersch noparkt.

I schaufle nie meh a Auto frei, bevor i mi net am Nommratafele vergwissert han, dass es au mei's isch. Mittlerweile schwätz i wieder mit meira Frau ...

Bis näggschd Woch'

Ihr

A large, stylized handwritten signature in black ink, appearing to read 'Wager'.